



Sabato Inalenga kwa Mwumbaji Wake

Kisha, nena wewe na wana wa Israeli, na kuwaambia, Hakika mtazishika Sabato zangu, kwa kuwa ni ishara kati ya mimi na ninyi katika vizazi vyenu vyote; ili mpate kujua ya kuwa mimi ndimi Bwana niwatakasaye ninyi.—
Kutoka 31:13.

Sabato ilitolewa kwa wanadamu kuwa ukumbusho wa kazi ya uumbaji. Yehova aliye Mkuu, alipokuwa ameweka misingi ya dunia, alipokuwa ameivisha dunia yote kwa vazi la uzuri, na kuumba maajabu yote kwenye nchi na baharini, alisimika siku ya Sabato, na kuitakasa. Wakati nyota za asubuhi zilipoimba pamoja, na wana wote wa Mungu walipopiga kelele kwa shangwe, Sabato iliwekwa pembeni kama sehemu ya kumbukumbu. Mungu aliitakasa na kuibarikia siku ambayo katika hiyo alipumzika kutoka katika kazi Yake yote ya ajabu. Na Sabato hii, iliyotakaswa na Mungu, ilikuwa iendelee kushikwa kama agano la kudumu. Ilikuwa kumbukumbu ambayo ilipasa isimame kutoka kizazi hadi kizazi, hadi kufungwa kwa historia ya dunia.

Mungu aliwatoa Waebrania kutoka katika utumwa wao wa Misri, na kuwaamuru kuishika Sabato Yake, na kuishika sheria iliyotolewa katika Edeni. Kila juma Yeye alitenda muujiza ili kuthibitisha akilini mwao ukweli kwamba pale katika mwanzo wa dunia Yeye alianza Sabato...

Wapo wale wanaoshikilia hoja kwamba Sabato ilitolewa kwa ajili ya Wayahudi tu; lakini Mungu kamwe hajawahi kusema hili, Aliwapatia watu Wake Israeli Sabato kama amana takatifu; lakini ukweli hasa kwamba jangwa la Sinai, na wala sio Palestina, palikuwa ndipo mahali alipopachagua Yeye ili atangaze sheria Yake, unadhihirisha kwamba Yeye alikusudia iwe kwa ajili ya wanadamu wote. Sheria ya amri kumi ni ya kale kama ulivyo uumbaji. Kwa hiyo, taasisi ya Sabato haina uhusiano maalum na Wayahudi, ulio tofauti na viumbe wengine wote. Mungu amefanya utunzaji wa Sabato kuwa wajibu kwa watu wote. Imetamkwa wazi, "Sabato ilifanyika kwa ajili ya mwanadamu, si mwanadamu." Hebu kila mmoja basi, aliye katika hatari ya kudanganywa katika hoja hii, atilie maanani Neno la Mungu badala ya madai ya watu.

Pale Edeni, Mungu alimwambia Adamu kuhusu mti wa ujuzi, "Maana siku utakapokula matunda ya mti huo utakufa hakika." "Nyoka akamwambia mwanamke, Hakika hamtakufa, kwa maana Mungu anajua ya kwamba siku mtakayokula matunda ya mti huo, mtafumbuliwa macho, nanyi mtakuwa kama Mungu, mkijua mema na mabaya." Adamu aliisikiliza sauti ya Shetani ikinena kupitia kwa mkewe; aliamini sauti nyingine badala ya ile iliyotamka sheria katika Edeni...

Kama mti wa ujuzi wa mema na mabaya ulivyokuwa jaribio la utii wa Adamu, vivyo hivyo amri ya nne ni jaribio ambalo Mungu amelitoa ili kuthibitisha utii wa watu Wake wote. Uzoefu wa Adamu yapasa uwe onyo kwetu, kadiri tunavyozidi kuwa na muda. Unatuonya kutokupokea hakikisho lolote kutoka kwenye vinywa vya watu au vya malaika litakalo tuondoa hata kidogo, hata kwa yodi moja kutoka katika sheria takatifu ya Yehova (The Review and Herald, Agosti 30, 1898).